

四庫全書

集部

欽定四庫全書

集部

詩話總龜卷一至四

詳校官侍郎<sub>臣</sub>劉躍雲

主事銜<sub>臣</sub>徐以坤覆勘

總校官編修<sub>臣</sub>倉聖脉

校對官中書<sub>臣</sub>李斯咏

謄錄監生<sub>臣</sub>王鍾岱

欽定四庫全書

集部九

詩話總龜

詩文評類

提要

臣等謹案詩話總龜前集四十八卷後集五十卷宋阮閱撰案胡仔苕溪漁隱叢話序曰舒城阮閱昔為郴江守嘗編詩總頗為詳備蓋因古今詩話附以諸家小說分門增廣獨元祐以來諸公詩話不載焉考編此詩總乃

宣和癸卯是時元祐文章禁而弗用故阮因以畧之據其所言則此書本名詩總其改今名不知出誰手也此本為明宗室月窻道人所刊併改其名為阮一閱尤為踈舛其書前集分四十五門所采書凡一百種後集分六十一門所采書亦一百種摭拾舊文多資考證惟分類瑣屑頗有乖于體例前有郴陽李易序乃曰阮子舊集頗雜月窻條而約之彙

次有義芬結可尋然則此書已經改竄非其  
舊目矣乾隆四十五年六月恭校上

總纂官臣紀昀陸錫熊臣孫士毅

總校官臣陸費墀



詩話總龜原序

白川子負譴嬰疾分牧芝城居常怏怏弗樂也廼月牕  
殿下時時遣貴侍覘之間授二冊曰是為詩話總龜是  
為宋阮一閱所編是為今程子珖所校是將壽諸文梓  
期與好事者共先生能無言乎余拜而受之枕次快閱  
曰佳哉月牕其披寶箴而璆琳琅玕畢集吾目邪其展  
武庫而戈矛劍戟震駭我心邪其過陶朱猗頓之室百  
物充溢足以拯急而切需者邪是富且竒也夫詩胡為

者也宣鬱達情擷菁登碩者也夫話胡為者也摘英拍  
類標理斥迷者也考諸三代而下春秋列國以上載諸  
經雜出乎詞宗孺婦之口可徵已嗣是以來作者非一  
家不能指而數也議者非一喙不能羣而聒也譬之鳳  
毛豹斑非不文彩炫耀望者興歎有遺恨焉蓋未獲總  
其龜耳今月牕廼能逸塵遠覽訂古準今與二三博雅  
君子冥羅約採彙為全書書有門示別也有類示同也  
有序示次也若有勸有規有慨有慕有願學之意則皆



置之不言之表而亦昭昭然灼灼然無言而無弗言孔子  
曰其義則某竊取之矣佳哉月牕之用心也昔河間以  
禮樂名東平以樂善著咸垂光汗青馨香帝胄至求述  
作槩乎未之前聞月牕孝友不凡文藝雋拔而又嗜好  
清絕如此方之二王得無過乎是書也我國家宗室之  
盛皇上風化之隆賢士夫裁正之畧並可仰見刻之宜  
書凡九十八卷月牕我高皇六世孫程琬修學楚郡為  
博士弟子員番陽人嘉靖甲辰孟秋奉直大夫江西饒

州府同知前進士南京刑部郎中海鹽白川張嘉秀  
撰

詩話總龜原叙

詩昉闕睢詩話即稗官野史之類自王迹熄而詩寢微  
變至於漢魏極于盛唐其遺韻餘音直將與宇宙間山  
川為流峙也漢藝文志註稗為細糲王者欲知閭巷細  
瑣之言故立稗官闕繫殆亦不小淮伯王月牕嗜古學  
文其志慕東平河間而欲相揖遜于異代者官服廼取  
阮子詩話總龜延庠生程琬校讐之命工刊布致言於  
余以叙諸首余披而閱之詩之有話言有繇也詩話以

總龜名言有統也龜千年五聚問無不知賀知章昔以  
為殷踐猷博學之號阮子之詩話其殆謂博而足以資  
問歟阮子舊集頗襍王條而約之彙次有義夢結可尋  
首觀其聖製等篇破魯恭之壁科斗錯陳也次觀其咏  
物等目浴玉池之日百寶爭出也又次觀其藝術紀實  
諸例發驪山之塚而彘鼎累累也終而觀其識夢鬼神  
諸簡燃牛渚之犀而幽恠又無以遜其形也夫殷之博  
以韻學而成名阮之博蓋勤諸詩與緒言而有得者王約

其博合二家而一之又不可以徒事于博語者其何以見之哉見之于凡例矣是則可嘉也是為序賜進士第中憲大夫奉勅整飭山東海道副使柳陽李易書



欽定四庫全書

詩話總龜卷一

宋 阮 閱 撰

聖製門

太宗好文進士及第賜聞喜宴常作詩贈之景祐朝因以為故事仁宗在位四十二年賜詩尤多然不必盡上所作景祐元年賜詩落句云寒儒逢景運報德合如何論者謂質厚宏壯真詔旨也

貢父詩話

李文正昉太祖在周朝已知其人及即位用以為相嘗

語文正曰卿在周朝未曾傾陷人可謂善人君子故  
太宗遇之亦厚年老罷相每內宴必先赴坐嘗獻詩  
曰微臣自愧頭如雪也向鈞天侍玉皇太宗和之以  
賜曰珍重老臣純不已我慚寡昧繼三皇為時之美

談

青箱雜記又談苑玉壺  
清話皆謂扈蒙應制

呂正惠端太宗朝為叅知政事多獨對便殿語必移刺  
因宴後苑上釣魚詩斷句云欲餌金鉤殊未達磻溪  
須問釣魚人意已屬公矣公和詩進曰愚臣鈞直難



堪用宜用濠梁結網人不數日拜平章事

詩史又古今詩話謂

正惠已作戶部侍郎平章事時呂文穆蒙正告老甚切因此詩遂冠合席

福唐蔡伯禧四歲對真宗誦讀授校書郎春宮伴讀齒

猶未三周故曰三歲神童賜之詩曰七閩山水多才

俊三歲竒童出盛時家世應傳清白訓嬰兒自得老

成資初嘗學步來朝謁方及能言解誦詩更勵孜孜

圖進益青雲千里有前期

續歸田錄

蘇易簡在翰林太宗一日召對賜酒甚歡暢曰君臣千

載遇蘇應聲曰忠孝一生心太宗大悅以所御金器

盡席賜之

振遺

夏侯嘉正好爐火仍以不得兩制為恨太宗御樓觀燈  
進詩十韻末句云兩制誠堪羨青雲侍玉輿太宗和  
賜曰薄德終難舉通才例上居嘉正嘗曰使我得求  
銀半兩知制誥一日平生足矣二願俱不遂而卒

玉

壺清話

李廷臣官於瓊館有夷人携錦臂條上織成一聯云恩

袍草色動仙籍桂香浮乃仁廟朝賜進士及第舉人  
詩也廷臣以千金易之藏為珍寶

青瑣集

忠義門

張巡守睢陽明皇已幸蜀胡羯方熾城孤勢促人食竭  
以紙布切煮而食之時以茶汁和食而意自如其謝  
金吾將軍表曰想峨眉之碧峰遊豫西蜀追綠耳于  
元圃保壽南山逆賊祿山戮屠黎獻臙臊闕廷臣被  
圍四十九日凡三千二百餘陣主辱臣死廼臣致命

之時惡稔罪盈是賊滅亡之日忠勇如此激厲壯士  
嘗賦詩曰接戰春來苦孤城日漸危合圍侷月暈分  
守效魚麗屢歎黃塵起時將白羽揮裏瘡猶出戰飲  
血更登陴忠信應難敵堅誠諒不移無人報天子心  
計欲何施又夜聞笛曰峇堯試一臨虜騎俯城陰不  
辨風塵色安知天地心營開邊月近戰苦陣雲深旦  
夕更樓上遙聞橫笛音

有唐佳話

趙師旦潛叔皇祐中守康州儂賊犯城死于是士大夫

作詩者衆而元厚之李擇中詩為最佳元詩云轉戰  
譙門日再晡空拳猶自冒戈殳身垂虎口方安坐命  
弃鴻毛更疾呼柱下杲卿存斷舌袴間杵白得遺孤  
可憐三尺英雄氣不愧西山士大夫李詩云賊壯兵  
孤衆膽驚忠臣此日見專城負君罪大寧如死守土  
城堅不問生報國存心惟自愧呼天壯氣幾時平潺  
湲多少英雄淚千古封江不斷聲

雲齋廣錄

王維字摩詰天寶末祿山陷兩京明皇出幸維扈從不

及為賊所得維服藥取利偽稱瘖病祿山素憐之遣  
人迎置洛陽拘于普施寺廼以偽命祿山宴其徒于  
凝碧宮其樂乃梨園弟子教坊工人維聞之悲惻潛  
為詩曰萬戶傷心生野烟百官何日更朝天秋槐葉  
落空宮裏凝碧池頭奏管絃賊平陷賊官者三等定  
罪維以凝碧詩聞于行在肅宗嘉之特宥之授太子

中允

劉約拾遺

晉天福三年與戎和晉祖曰當遣輔相為使趙瑩桑維

翰同堂皆未言以戎雖通好而反覆難測咸懼於將  
命馮道與諸公中書食訖分聽堂吏前白道言北使  
事吏人色變手顫道索紙一幅書云道去即遣寫敕  
屬吏泣下道遣人語妻子不復歸家舍都亭驛不數  
日即行晉祖餞語以家國之故煩者德使遠自酌卮  
酒飲之虜以道有重名欲留之命與其國相同列所  
賜皆等戎賜臣下以牙笏及膾月賜牛頭皆為殊禮  
道皆得之以詩謝云牛頭偏得賜象笏更容持戎甚

喜潛諭留之道曰兩朝皆臣豈有分別賜忠市薪炭  
云北地寒老年不堪及還京師作詩五章以述北使  
之意其首章云去年今日奉皇華祇為朝廷不為家  
殿上一盃天子泣門前雙節國人嗟龍荒冬往時時  
雪兔苑春歸處處花上下一行如骨肉幾人身死掩  
風沙虜中大寒賜錦襖貂襖羊狐貂衾各一每入謁  
忠服四襖衣宿館中併覆三衾詩曰朝披四襖專蔽  
手夜蓋三衾怕露頭

叢苑



劉吉江左人有膂力尚氣事李煜為傳詔承旨以忠于  
所奉歸朝供奉官以知河渠利害委以八作務太平  
興國中河大決吉護之與工夫同甘苦使者至訪吉  
不獲甚怒乃著皂短布褐獨負二囊土為先導從吏  
無敢言使者密訪得之歸奏仁宗厚賜之內侍石全  
振領河堤甚苛急自謂石爆裂嘗侮吉吉不與校一  
日吉乘小艇督役至中流語石曰公恃貴近見凌甚  
不畏死當與公同見河伯遂蕩舟覆之全振乞命號

泣乃止不復敢侵吉吉本燕薊人自受李氏恩常分  
祿以濟其子孫朔望必拜李煜真雖童幼必拜之執  
臣僚之禮後為崇儀使其刺字謁吳中親舊題僧寺  
驛亭皆自稱以南人不忘本也有詩三百首目為釣  
鰲集徐鉉為序其首篇隱者詩曰一箭不中鵠五湖  
歸釣魚人多誦之以塞河有方略人目為劉跋河名震

河上

同前

諷諭門

太平興國中李繼遷以西夏叛朝廷興師剪伐迨十年  
餘至咸平末猖獗愈盛寇陷邊境章聖以西民疲于  
輸輓有戢兵之意而無名以罷師伐議者益紛紜未  
決事固秘密未聞於外處士种放山中有詩云胡雛  
負恩信聖主耻干戈章聖聞之歎美且愜素志即遣  
使齎詔召至授左司諫直昭文館會景德初邊臣奏  
李繼遷死其子阿移即德明也願納款遂罷兵放隱  
終南山累詔不起至拜官復歸終于工部侍郎

誌逸

淳化中合州貢桃花犬甚小而性急常馴擾於御榻之側每坐朝犬必掉尾先吠人乃肅然太宗不豫此犬不食及上仙號呼涕泗瘦瘠章聖初即位左右引令前導鳴吠徘徊意若不忍章聖令諭以奉陵即搖尾飲食如故詔造大鐵籠施素裯置鹵簿中行路見者流涕李至作桃花犬歌以寄史官錢若水末句云白麟赤鳳且勿喜願君書此懲浮俗

古今詩話

章聖幸汾陰凝望林嶺間亭檻幽絕意非民俗所居時

魏野方教鶴舞俄報有中使至抱琴踰垣而走後寇  
萊公鎮洛凡三邀不至萊公暇日寫刺訪之野服葛  
巾布袍長揖萊公禮甚平簡頃之議論騷雅相得甚  
歡將別謂萊公曰盛刺不復還留為山家之寶萊公  
再秉釣軸野常游門下顧遇之禮優異等倫一日獻  
詩曰好去上天辭富貴却來平地作神仙萊公得詩  
不悅自是禮日益薄即辭去後二年貶通州每題前  
詩于窓朝夕吟哦之

王文正公旦在中書僅二十年魏野贈詩曰聖朝宰相  
年年出公在中書十四秋西祀東封今已畢可能來伴  
赤松遊公袖書以進累表求退不許

青箱雜記

別本云昔時宰相年年出公在中書十一秋西祀東封  
俱已了如今好逐赤松遊

治平中有吉州吉水令忘其姓名治邑嚴酷有野人馬  
道為啄木詩諷之曰翠翎迎日動紅觜響烟蘿不顧  
泥丸及唯貪得食多纔離枯朽木又上最高柯吳楚

園林閤忙忙爭奈何令見其詩稍緩刑時人目曰馬

啄木

翰府名談

蔡君謨守福唐政尚嚴肅陳列先生過福唐維舟溪亭  
留詩於亭上曰溪山龍虎蟠溪水鼓角喧中宵鄉夢  
破六月夜衾寒風雨生殘木蛟螭喜怒瀾殷勤告舟  
子放棹過前灘亭吏錄以呈公公遽令追之已不及  
矣公自此為之少霽威明

同前

范希文有贈釣者詩曰江上往來人盡愛鱸魚美君看

一葉舟出沒風濤裡觀競渡詩曰小艇破濤去旁觀亦損神他年在平地無忽險中人皆不徒作也

同前

宜春王從謙李璟之第九子好學喜為詩璟於苑中與宰相奕棋從謙在焉令賦觀棋詩曰竹林二君子盡日意沉吟相對雖無語爭先各有心恃強知易失守分固難侵若算機籌處滄溟想未深

楊珍靖夫盧卿之曾孫也仕偽蜀王建至顯官隨王衍歸後以老得工部尚書致仕歸長安舊居多為鄰里



侵占子弟欲詣府訴其事以狀白珍珍批紙尾云四鄰侵我我從伊畢竟湏思未有時試上含元殿基望秋風禾黍正離離子弟不復敢言

談苑

舒王得請金陵門下有人賣魚一日放魚有門生獻詩云直須自向池邊看今日誰非鄭校人公誦久之

詩

史

蔣貽恭蠶詩云辛勤得繭不盈筐燈下繅絲恨更長著

處不知來處苦但貪身上繡衣裳

古今詩話

華山鄭雲更有傷時一絕云帆力劈開滄海浪馬蹄踏  
盡亂山青浮名浮利濃如酒醉得人心死不醒又贈  
霍山秦道士云老鶴啼猿伴採芝有時長嘆獨移時  
翠蛾紅粉嬋娟劍殺盡世人人不知

同前

宋齊邱江南二世為宰相璟尤愛其才然知其不正一  
日於華林園試小妓羯鼓名齊邱同宴齊邱獻詩曰  
切斷牙床鏤紫金最宜平穩玉槽深因逢淑景開佳  
宴為出花奴奏雅音掌底輕琤孤鶴噪枝頭乾快亂

蟬吟開元天子曾如此今日將軍好用心

同前

唐李日知為黃門侍郎安樂公主池館新成中宗臨幸  
從官預宴賦詩日知尤存規戒其卒篇云所願暫思  
居者佚莫使時稱作者勞

盧任門族甲於天下舉進士三十尚未第為一絕云惆  
悵興亡係綺羅世人猶自選青娥越王解破夫差國  
一箇西施已是多

同前

范文正謹言勁節知無不言仁廟朝數出外補梅聖俞

作啄木詩以見意曰啄盡林中蠹未肯出林飛不識

黃金彈雙翎墮落暉

同前

夏英公慶歷中欲真拜以言者罷除使相知南京到任  
以一詩寄執政云造化平分荷大鈞腰間新佩玉琪  
璘南湖不住栽桃李擬狎沙鷗過十春海雁橋邊春  
水深略無塵土到花陰忌機不取人知否自有江鷗  
信此心復徙西都張昇知諫院作青雀詩寄之曰弱  
羽傷弓尚未完孤飛誰敢擬鴛鸞明珠自有千金價

莫為遊人作彈丸昇卒不敢言及之

同前

于瀆為詩頗干教化對花詩云花開蝶滿枝花謝蝶還  
希惟有舊巢燕主人貧亦歸又有唐倘者與瀆同聲  
咸多比諷有詩曰天若無雪霜青松不如草地若無  
山川何人重平道題道傍木云狂風拔倒樹樹倒根  
已露上有數枝藤青青猶未悟又曰一日天無風四  
溟波盡息人心風不吹波浪高百尺

盧懷扞情

西京端正木去馬嵬一驛德宗幸奉天觀其蔽地錫以

美名後有文士題之曰昔日偏霑雨露恩德皇西幸  
賜佳名馬嵬此去無多地好向楊妃塚上生

同前

羅鄴工詩春遊鬱然有懷云芳草如烟處處青間門要  
地一時生年來檢點人間事惟有春風不世情春雨  
詩云兼風颯颯灑皇州能帶輕寒阻勝遊昨夜五侯

池館裡佳人驚覺為花愁

同前

僖宗幸蜀詞人題于馬嵬驛云馬嵬烟柳正依依重見  
鑾輿幸蜀歸泉下阿蠻應有語這回休更怨楊妃或

云狄侍郎歸昌詩

同前鑑戒錄云是羅隱詩

盧常侍鉅牧廬江日郡職曹先生悅營妓丹霞者盧沮  
不許會餞客短亭曹獻詩曰拜玉亭間送客忙此時  
孤恨感離鄉尋思往歲絕纓事肯向朱門泣夜長盧  
演為長句和而勉之曰桑扈交飛百舌忙祖亭聞樂  
倍思鄉樽前有恨慚卑宦席上無憐愛艷粧莫為狂  
花迷眼界須求真理定心王遊蜂採掇何時已祇恐

多言議短長

盧懷抒情

李羽能詩五十方擢第嘗獻江淮郡守詩曰塞詔東來  
淝水濱時情惟望秉陶鈞將軍一陣為功業忍見沙

場百戰人蓋郡守盧公一舉及第

南唐近事

景祐中羌人叛四方用兵朝廷求草澤遺逸士多獻方  
畧自衒鬻率皆得官其下材無能往往過望亦有挾  
持頡頏觸望不服者嘗有人題闕西驛舍為詩曰孤  
星熒熒照寒野漢馬蕭蕭五陵下廟堂不肯用竒謀  
天下徒勞聘賢者萬里危機入燕薊八方殺氣衝靈



夏逢時還似不逢時已矣吾生真苟且

東齊錄

汪自能為文章有平糴詞詩意高古刺譏中時病云穴

垣補牆缺牆成垣已隳斷屨

原闕

穿履穿屨亦虧汪

氏官不達其他著述不傳

唐文宗曰嘗觀晉君臣以夷曠致傾覆當時卿大夫過  
耶李石曰然古詩有之人生不滿百常懷千歲憂  
不逢也晝短苦夜長暗時多也何不秉燭遊勸之照  
也臣願捐軀命濟國家惟陛下鑑照不惑則安人強

國其庶幾乎

鑑誠錄

余在黃州與陳慥季常往來每過往之際輒作泣字韻詩一篇季常不禁殺因以此諷之季常既不復殺而里中皆化之至有不食肉者皆云未死神已泣此語

使人悽然

百斛明珠

盧承丘長沙人披褐居吳芙蓉山常著文為芙蓉集作落韻詩雖一時諷罵聞者亦可為戒題花鈿云傳粉銷金剪翠霞黛烟濃處貼鉛華也知曾伴姮娥笑將

來村裏賣誰家又題渡頭船云剡木功成濟往還古  
溪殘照下前山看看向晚人來少猶自湏來覓見錢

年八十卒於所居

雅言系述

東坡云在頰時陳無已趙德麟輩適亦守官於彼而歐  
陽叔弼與李默亦又居間日相唱和而二歐頗不作  
詩東坡以句批之云君家文律冠西京旋築詩壇按  
酒兵袖手莫欺真將種致師湏得老門生明朝鄭伯  
降誰受昨夜條侯壁已驚從此醉翁天下樂還湏一

舉百觴傾蓋為文忠公昔有詩贈梅聖俞蘇子美云  
我亦願助勇鼓旗噪其旁快哉天下樂一酌宜百觴  
也 王直方詩話

景祐中華州張源作絕句云太公年登八十餘文王一  
見便同車如今君向江邊釣也被官中配看魚吟此  
詩畢入夏州其後元昊反關中有兵者六七年不解  
源作是詩以叛去亦足為戒 東齊錄

李清臣北都人方束髮時才俊詞句驚人一日薄遊鄭

州時韓公為帥因往見其大祝吏報曰大祝方寢遂  
求筆為詩一絕書于刺授其吏曰大祝覺則投之詩  
云公子乘閒卧綵厨白衣老吏慢寒儒不知夢見周  
公否曾說當年吐哺無

青瑣集

聶夷中公子詩云種花于西園花發青樓道花下一禾  
生去之為惡草有三百篇之旨

章子厚謫雷州過小貴州南山寺有僧奉忠子厚見之  
已而倚檻看層雲曰雲多竒峰真善比類忠曰曾記

金方石本全言 卷一  
夏雲詩甚竒曰如風如火復如綿飛過微陰落檻前  
大地生靈乾欲死不成霖雨謾遮天

太祖問罪江南李後主用謀臣計欲拒王師法眼禪師  
觀牡丹於大內作偈諷曰擁毳對芳叢由來趣不同  
髮從今日白花是去年紅艷冶隨朝露馨香逐晚風  
何須待零落然後始知空後主不省王師渡江

詩話總龜卷一

欽定四庫全書

詩話總龜卷二

宋 阮 閱 撰

達理門

世傳馮瀛王詩有曰窮達皆由命何勞發歎聲但知行  
好事莫要問前程冬去冰湏泮春來草自生請公觀  
此理天道甚分明又曰莫為危時便愴神前程往往  
有期因湏知海嶽歸明主未必乾坤陷吉人道德幾  
時曾去世舟車何處不通津但教方寸無諸惡狼虎

叢中也立身達者之言也

張文定公齊賢嘗作詩自戒并貽子孫曰慎言渾不畏  
忍事又何妨國法須遵守人非莫舉揚無私仍克已  
直道更和光此箇如端的天應降吉祥余廣為八詩  
其一曰慎言渾不畏言出患常隨須信樞機發寧容  
駟馬追三緘事可見兩舌業當知言是起羞本憑公  
且再思其二曰忍事又何妨勿令心火揚火揚猶可  
滅心忿固多傷堪嘆波羅蜜可憐歌利王從心更從



及字意好推詳其三曰國法湏遵守金科盡詔條一  
毫如有犯三尺不相饒豈用誇奸黠何湏恃貴驕自  
然逢吉慶神理亦昭昭其四曰人非莫舉揚萬事且  
包藏殿上涎湏掩車中吐不妨在他誠所短于已有  
何長湏是常拘檢回頭自忖量其五曰無私仍克己  
克己又無私二事無修飭終身在省思公清多斂怨  
高亢易招危更切循卑退方應履坦夷其六曰直道  
更和光雙修譽乃彰直湏和輔助和乃直交相恃直

終多忤偏和又少剛能和又能直行已自芬芳其七  
曰此個真端的除非六句修永為几杖誠更遺子孫  
謀本立方生道農勤乃有秋茲詩雖淺近至理可推  
求其八曰天應降吉祥天理本茫茫舒慘雖無定榮  
枯却有常益謙尤効驗福善更昭彰籠絡無踈漏恢

恢四網張

同前

王文惠公隨深悟性理臨終作詩曰畫堂燈欲滅彈指

向誰說去住本尋常春風掃殘雪

同前

謝諫議臨捐館作詩云平生功業數張紙千古英雄一

窖塵何似從來周孔教解將仁義浸生民

見聞錄

皎然禪師贈吳馮處士詩云世人不知心是道只言道  
在他方妙還如瞽者望長安室在東南向西笑東坡  
代答曰寒時便具熱時風飢漢那知食藥功莫怪禪  
師向西笑緣師身在長安東

百斛文

陶淵明飲酒詩云善養千金軀臨化消其寶寶不過軀  
軀化則寶亡矣人言靖節不知道吾不信也

余與郭生遊寒溪主簿吳亮置酒郭生善作挽歌酒酣  
發聲座為淒然郭生言恨無佳詞因為略改樂天寒  
食詩歌之坐客有泣者其詞曰鳥啼鷓鴣噪昏喬木清  
明寒食誰家哭風吹曠野紙錢飛古墓纍纍春草綠  
棠梨花映白楊路盡是死生離別處冥漠重泉哭不  
聞蕭蕭暮雨人歸去每句雜以散聲

人間有漏仙兀兀三杯醉世上無眼禪昏昏一覺睡雖  
然無交涉其柰畧相似相似尚如此何況真箇是予奉

使閩西見邱璧書此愛而誦之故海上作濁醪有妙  
理賦曰嘗因既醉之適方識此心之正此老氏言心  
之正與孟子言人之性善何異

並同前

舒王當位多進用文士蘇臺盧中甫作詩以見志云青  
衫白髮病叅軍旋糶官糧買酒尊但得有錢留客醉

何須騎馬傍人門

雅言雜載

杜祁公致政後作林下書懷詩曰從政區區到白頭一  
生寧肯顧恩仇雙鳧乘雁常深愧野馬黃牛亦過憂豈

是林泉堪佚老祇緣蒲柳不禁秋始終幸會承平日

樂聖唯能擊壤謳

青箱雜記

李建勳年八十謁宋齊丘於洪州題一絕于信果觀壁

云春來漲水流如活曉後西山勢似行玉洞主人經

却在攜筇步步就長生歸高安無病而卒

青璣後集

東坡遊廬山至東林作二偈曰溪聲便是廣長舌山色

豈非清淨身夜來八萬四千偈他日如何舉似人橫

看成嶺側成峰遠近看山了不同不識廬山真面目

祇緣身在此山中山谷曰此老於般若橫說豎說了  
無剩語非筆端有口安能吐此不傳之妙

冷齋夜話

### 博識門

徐錯仕江左至中書舍人時吳淑為校理古樂府中摻  
字者淑多改為操字盖章草之變錯曰非可一例言

若漁陽摻者

七鑑切

三搗鼓也禰衡作漢陽摻搗古

歌云邊城晏聞漢陽摻黃塵蕭蕭白日暗淑歎服

談

苑

商汝山中多麝絕愛其臍每為人所逐勢且急即自投  
高巖舉爪裂出其香就繫而死猶拱四足以保其臍  
李商隱詩曰投巖麝退香許渾詩云尋麝采生香是也  
狨類鼠而大尾長金色川峽深山中人以藥箭射之  
取其皮為卧褥鞍被坐毯之用甚愛其尾既中毒即  
嚙斷尾以擲之惡為身患杜甫詩云狨擲寒條馬見  
驚蓋輕捷喜緣木獼猴之類也犛牛出西域尾長而  
勁中國以為纓人或射之亦自斷其尾左氏所謂雄



雞自斷其尾

同前

李義山詩小鼎烹茶面曲池白鬚道士竹間棋何人書  
破蒲葵扇記着南窓移樹時蒲葵扇出謝安傳然人  
不知其何名蒲葵蘇子容云梭櫚也出廣雅今衢杭  
宣歙間扇是也謂彩似蒲葵爾

詩史

梅聖俞河豚詩云春岸飛揚花永叔謂河豚食楊花則  
肥韓渥詩柳絮覆溪魚正肥大抵魚食楊花則肥不  
必河豚

隴西地名魚龍出石魚掘地得石破其中有魚痕鱗甲  
纖悉皆具燒之有魚氣蓋魚蟄泥而變為石衡州亦  
有無異隴西者故杜云水落魚龍夜山空鳥鼠秋正

隴州詩

南部烟花錄文理極俗又載陳叔寶詩云夕陽如有意  
偏傍小窻明此乃唐人方棫詩非叔寶作兼六朝人  
大抵不如此唐藝文誌載烟花錄乃記廣陵行幸事  
此本已無唐末人偽作此書爾

詩史

歐陽文忠愛林逋詩草泥行郭索雲木叫鉤輶以謂語  
新而屬對親切鉤輶鷓鴣聲也郭索蟬行貌太元曰

蟬之郭索用心躁也

古今詩話

古詩云博山爐中百和香鬱金蘇合及都梁又麝鼯毯毯  
五木香迷迭艾納及都梁嘗按唐志都梁香出交廣形  
如藿迷迭出西域魏文帝又有迷迭賦信乎不行一  
萬里不讀萬卷書不可看老杜詩也

王直方詩話

前世所稱馭僮馭

子黨切

今人謂之牙韓文公贈玉川詩

曰水北山人得名聲去年去作幕下士水南山人又  
繼往鞍馬僕從塞間里少室山人索價高兩以諫官  
招不起又云先生抱才湏大用宰相未許終不仕故  
向子直謂韓公與處士作牙牙高度物價也駟僧為  
牙者世不曉所謂道源云本謂之互即互市事爾唐  
人書互字作牙牙字似牙字因轉讀為牙其理如可  
信或云安得舉世同辭蓋不足恠今人以萬為万以  
千為千亦人人道之也

貢父詩話

楊大年因奏事論及比紅兒詩大年不能對甚以為恨  
訪比紅兒詩終不可得忽一日鬻書者有小編賦之  
乃比紅兒詩也自此士大夫始傳之此詩乃羅虬所  
為凡百首蓋當時但傳其詩不載名氏大年偶不記

爾

筆談

余靖尚書使虜為胡詩契丹愛之再往情益親余詩云

夜筵設羅

侈盛也

臣拜洗

受賜也

兩朝厥荷

通好也

情幹勒

厚重也

微臣稚魯

拜舞也

祝若統

福祐也

聖

壽鐵擺

高高也

俱可忒

無極也

又舉大杯謂余曰能

道此余為卿飲復舉之因大笑遂為酌觴漢史記槃

木白狼詩漢語則協夷語則否其實夷人先作詩反

用夷語譯出不如余真胡語也

詩史

山谷云余讀周書月令云反舌無聲佞人在側廼解老

杜百舌詩過時如發口君側有讒人之句

直方詩話

永明禪師記曰有禪師夜經行誤踐瓜皮意其蝦蟆也

死墮惡道又有山行人為蛇螫而意觸樹椿行三十

里遇箴醫識之告曰蛇螫也發毒而死使行人不遇  
箴醫毒遂不發比丘知是瓜皮不墮惡道古德偈曰  
惡境自虛不須畏終朝照矚元無對設使任他浮幻  
身任運都無舌身意

冷齋夜話

### 幼敏門

楊文公年十一歲建州送入闕下章聖親試一賦二詩  
頃刻而成令送中書再試叅政李至狀臣等言仰送  
建州十一歲習進士楊億到中書其人來自江湖對天

陞殊無震惕蓋聖祚承平神童間出臣等令賦喜朝  
京闕詩五言六韻頃刻而成詩曰七閩波渺漢雙闕  
勢峒堯曉登雲外嶺夜渡月中潮斷句願秉清忠節  
終身立聖朝

又楊文公數歲不能言一日家人抱登樓忽觸其首便  
能語家人曰既能言可為詩乎曰可遂吟登樓詩云  
危樓高百尺手可摘星辰不敢高聲語恐驚天上人

古今詩話



夏文莊試制科廷對出殿門楊徽之見其年少遽邀與  
語曰老夫他則不知唯喜吟詩願丐賢良一篇以下  
他日之志忻然為書曰殿上袞衣明日月硯中旗影  
動龍蛇縱橫禮樂三千字獨對丹墀日未斜

青箱記

明皇御勤政樓大張音樂教坊王大娘善戴竿於百尺  
上為木山狀瀛洲方丈命小兒持絳節出入其間舞  
亦不輟劉晏以神童為秘書省正字年十歲慧悟過  
人召於簾中坐貴妃膝上為施粉黛與戴巾櫛問晏

汝為正字官而來正得何字曰天下字皆正惟朋字  
未正貴妃令詠王大娘戴竿晏曰樓前百戲競爭新  
惟有長竿妙入神誰謂綺羅翻有力猶自嫌輕更著

人  
明皇雜錄

蘇瓌未知男題有人獻兔掛於廊廡間名題詠詩兔子死  
闌彈將來掛竹竿試將明鏡照何異月中看由是稱

為小許公

開元傳信記

京兆尹訪蘇瓌既去瓌令男題詠尹字乃曰丑雖有足甲

不成身見君無口知伊少人其敏捷如此明皇問瓌  
草書難其人誰可瓌曰臣不知其他臣男頰為文甚  
速可倘使令然性嗜酒幸免沉醉足以了事令召至  
則酒未解猶嘔殿下命中貴人扶卧御幄前明皇親  
舉衾覆之既醒援筆立就明皇撫背曰知子莫若父

明皇雜錄

徐鉉字楚金年十餘歲羣從宴集分題賦詩令為秋詞  
援筆立成其畧曰井梧分墮砌塞鴈遠橫空雨久莓

苔紫霜濃薜荔紅

詩史

卷二

林傑字智用五歲與父同遊王仙君壇父曰能詩乎傑  
曰羽客已登雲路去丹砂草木盡凋殘不知千歲歸  
何日空使時人掃舊壇又謁唐中丞作七夕詩曰七  
夕今朝看碧霄牽牛織女渡河橋家家乞巧望秋月  
穿盡紅絲幾萬條唐公曰真神童也年十歲方秋初  
忽有雙鶴盤空而下忻然下塔抱得一隻父恐非祥令  
放之鶴升空而去是夕得疾而卒鄭立之以詩哭之

曰才高未及賈生年何事孤魂逐逝川  
螢聚帳中人  
已去鶴離臺上月空圓

古今詩話

李琪十歲通六經父佐王鐸滑州幕聞而異之會府燕  
鐸遣人以三傑賦試之琪作賦尾句云得士則昌非  
賢罔共龍頭之友斯貴鼎足之臣可重宜哉項氏之  
所以亡有一范增而不能用鐸曰大器也他日謁帥  
帥謂琪曰蜀中詔到用夏州托拔思恭為北京牧復  
都統可作詩否琪曰飛騎日邊來何時玉輦回早平

闕右賊莫待詔書催鐸益異之

王元之內翰五歲已能詩因太守賞白蓮倅言元之能  
詩語於太守因名而吟一絕云昨夜三更後姮娥墮  
玉簪馮夷不敢受捧出碧波心又云佳人方素面對  
鏡理新粧守曰天授也

邱璠十歲謁陳州太守曰前日寺中聞射因成詩云殿  
宇時聞燕雀鳴虛庭晝日少人行孤吟獨坐情何限  
時喜風傳中鵠聲守喜令對弱柳絲絲搓綠線曰春

雲片片揭新綿

蔣堂侍郎方六歲父令作梔子花詩曰庭前梔子樹四  
畔有桮杓未結黃金子先開白玉花

崔鉉相為童時隨父謁韓滉指架上鷹令作詩曰天邊  
心膽架頭身欲擬飛騰未有因萬里碧霄終一去不  
知誰是解條人

李賀字長吉唐諸王孫七歲以長短之製名動京師韓  
文公皇甫湜過其父晉肅見其子總角荷衣而出二公

不之信因面試一篇賀承命忻然操觚染翰旁若無人仍目曰高軒過華裾織翠青如蕊金環壓轡搖玲瓏馬蹄隱耳聲隆隆入門下馬氣如虹云是東京才子文章鉅公二十八宿羅心胸殿前作賦聲摩空筆補造化天無功元精炯炯貫當中龐眉書客感秋蓬誰知死草生華風我今垂翅負冥鴻他日不羞蛇作龍二公大驚以所乘馬聯鑣而還所居親為束髮年未弱冠丁內艱他日舉進士或諉賀不避家諱韓文公



特著諱辨一篇不幸未杜室而終

並同前

寇元弼言徐州通判李絢有子七歲不善詩忽詠落花  
詩云流水難窮目斜陽易斷腸誰同研光帽一曲舞  
山香父驚問之若有物憑者自云是謝中舍問研光  
帽事西王母宴羣仙有舞者戴研光帽帽上簪花舞  
山香曲未終花皆落

百斛文

賈文元乃唐相造華夷圖丞相耽之遠孫七歲童子舉  
闕頭及第李文賀贈詩云七歲神童古所難賈家門

戶有衣冠七人科第排頭上五部經書誦舌端見榜  
不知名字貴登筵未識管絃歡從茲穩上青霄路萬  
里誰能測羽翰太平興國中叅大政

玉壺清話

蘇州童子劉少逸年十一文辭精敏有老成體其師潘  
閔攜以見長洲宰王元之吳縣宰羅思純以所作贄  
二公二公名重當時疑所贄假手未之信因試之與之  
聯句畧不淹思思純曰無風烟焰直少逸曰有月竹  
陰寒又曰日移竹影侵棋局少逸曰風遞花香入酒

尊元之曰風雨江城暮少逸曰波濤海寺秋元之曰  
一回酒渴思吞海少逸曰幾度詩狂欲上天二公驚  
異至聞於朝賜進士及第官止尚書員外郎

續歸田錄

孫周翰精敏亦少逸之流其父穆之攜以見郡侯時賞  
春作會座客簪花郡侯屬周翰曰口吹楊葉成新曲  
翰曰頭戴花枝學後生郡侯笑曰何遽便戲老夫賜  
童子出身

馬希振為鼎州節度使馬氏諸子中白眉也與門下客何

致雍僧貫薇聯句希振曰青蛇每用腰為力貫薇曰  
紅莧時將葉作花又見蟻子緣砌希振曰蟻子子銜  
蛭子子雍曰猫兒兒捉雀兒兒實一代之雋

並同前

黃鑑學士七歲而不言其祖愛之以為風骨之美當大  
吾門不宜如是也每遇景物必道其名達其理以拍  
教之然終不言一日又謂之曰楊文公幼而不言文  
公之父告之曰後園梨落籬神童知不知文公發聲  
曰不是風搖樹便是鵲驚枝汝風骨若此何為不言

鑑竟不對後攜行河上其祖曰水馬池中走鑑曰遊  
魚波上浮後任館閣

李廣靖聞見錄

詩話總龜卷二

欽定四庫全書

詩話總龜卷三

宋 阮閱 撰

志氣門

丞相李文正公昉少年時嘗以詩呈叔侍中覽而喜贈之詩曰反觀西里盛世世秉鈞衡後文正果大用詔賜所居為謝元卿秉鈞里是知李氏自五代至本朝世居將相非一日也

翰林名贊

陳文惠未達時作偶成詩曰千里好山雲乍歛一樓明

月雨初晴觀此詩者曰意與李靚碧山更被暮雲遮者異矣

青箱雜記

宋莒公守潁昌開西湖作詩曰鑿開魚鳥忘情地展盡江湖極目天觀者知其必大用

丞相劉公沆以氣義自許嘗作牡丹詩曰三月內方有百花中更無又述懷詩曰虎生三日便窺牛獵食寧能掉尾求若不去登黃閣貴便湏來伴赤松遊奴顏婢舌誠堪耻羊狼貪自合羞三尺太阿星斗煥何



時去取魏齊頭皇祐初出鎮豫章漕使潘夙以小孤  
山四十字示公公即席和之曰擎天有八柱此柱一  
馬存石聳千尋勢波流四面痕江湖中作鎮風浪裏  
蟠根平地安然者饒他五岳尊覽者皆知有宰相器  
蔣槩治平中登第後久不調官遊河朔登雄州北門樓  
有詩曰壯士未酌志乘秋感慨多幽燕新種落唐漢  
舊闕河塞月沉青塚邊聲入暮河如何得萬騎玉壘  
夜經過不幸早死觀其志亦有為者也

並同前

長安舊以不歷臺省使出鎮廉訪節鎮者為麓官大率  
重內而輕外今東都乾元門舊宣武軍鼓角門節度  
王彥威有詩刻其上云天兵十萬勇如貔正是酬恩  
報國時汴水波濤喧鼓角隋堤楊柳拂旌旗前驅紅  
旆關西將坐間青娥趙國姬寄語長安舊冠蓋粗官  
到底是男兒彥威自太常博士出辟使府至茲鎮故  
有是句至今不知所在薛能亦有謝寄茶詩云粗官  
寄與真拋擲賴有詩情合得嘗

談苑

李昇竹詩曰棲鳳枝稍猶軟弱化龍形狀已依稀唐宣  
宗瀑布詩曰溪澗豈能留得住終歸大海作波濤王  
霸之意可見也河中府逍遙樓有唐太宗詩曰昔乘  
四馬去今驅萬乘歸氣象尤可見

詩史

唐子方謫官渡淮至中流風作舟欲覆作詩曰聖宋非  
狂楚清淮異汨羅平生仗忠信今日任風波日暮泊  
舟岸續云舟楫顛危甚龜鼉出沒多斜陽幸無事沽  
酒聽漁歌真詩無諂可以格鬼神

雲齋錄

景祐五年苑試進士以鯤化為鵬為詩題呂濟叔詩云  
九霄離海嶠一夕過天池論者以此當為第一人

同

前

沙門文瑩嘗謂為文老而不衰者惟元厚之在禁林時  
有懷荆南舊遊云去年曾醉海棠叢聞說新枝發舊  
紅昨夜夢回花下飲不知身在玉堂中

樂天典杭日江東學子奔杭取解張祐自負詩名而徐  
凝亦至燕于郡中樂天諷二子矛盾祐曰僕宜為解

首凝曰有何佳句祐曰甘露寺詩曰月光先到山  
河勢盡來金山寺詩曰樹影中流見鐘聲兩岸聞凝  
曰善則善矣奈無野人瀑布詩曰千古長如白練飛  
一條界破青山色祐愕然一座盡傾

古今詩話

王沂公布衣時以梅花詩獻呂文穆公云雪中未問和  
羹事且向百花頭上開文穆曰此生已安排狀元宰  
相也後果然

姚嗣宗詩云踏碎賀蘭石掃清西海塵布衣能效死可

惜作窮鱗韓魏公安撫關中薦試大理評事

同前

高越遊河朔有州牧欲以女妻之越作鷄子詩云雪爪  
星眸衆鳥歸摩空專候整毛衣虞人莫謾張羅網未  
肯平原淺草飛

孫給事僅及孫暨皆咸平初省試放狀元後各應制舉  
給事與兄何齊名有聲場屋何淳化中魁多士給事  
下第有詩曰前春再就天堦試應被人呼小狀元次  
舉中甲科王元之以詩贈曰病中何事忽開顏憶得

詩稱小狀元粉壁已懸龍虎榜錦標爭屬鵲鴿原

並

同前

高言京師人字明道好學有志義以詩干友人曰昨夜  
陰風透膽寒地爐無火酒瓶乾男兒慷慨平生事時  
復挑燈把劍看

秦少游謫雲州有詩曰南土四時都熱愁人日夜俱長  
安得此心如石一時忘了家鄉黃魯直謫宜州作詩  
曰老色日上面歡情日去心今既不如昔後當不如

今輕紗一幅巾短簟六尺牀無客日自靜有風終夕  
涼少游鍾情故詩酸楚魯直學道故詩閒暇至東坡  
南中詩曰平生萬事足所欠唯一死則英特之氣不  
受折困

知遇門

揚徽之侍讀太宗聞其名索之著數百篇奏御獻詩云  
十年牢落今何幸叨遇君王問姓名太宗選十聯書  
於御屏間梁周翰詩曰誰似金華楊學士十聯詩在



御屏間僧文瑩嘗謂楊公必以天池浩露滌筆於水甌  
雪碗中則方與公詩神骨相副

古今詩話

夏文莊守安陸宋莒公兄弟尚皆布衣文莊異待之命  
作落花詩莒公曰漢皋珮解臨江失金谷樓危到地  
香子京曰將飛更作回風舞已落猶成半面粧是歲  
詔下兄弟皆應舉文莊曰詠落花而不言落大宋須  
狀元及第又風骨秀重異日作宰相小宋非所及然  
亦須登嚴近後皆如其言故文莊在河陽聞莒公登

庸以別紙賀曰昔年安陸已識台光蓋謂是也

青箱

雜記

杜荀鶴謁梁高祖與之坐忽無雲而雨祖曰無雲而雨  
謂之天泣不知何祥請作詩荀鶴曰同是乾坤事不  
同雨絲飛洒日輪中若教陰顯都相似爭表梁王造

化工高祖喜之

洞微志

真宗末年嘗游禁中見翰林學士王禹偁倚宮木若詠  
吟命宮使亟探之果預作賞花釣魚詩明日百官赴

宴迨題出乃千葉石榴花百官皆失所擬禹偁首進  
一絕云王母庭中親見栽張騫偷得下天來誰家巧  
婦殘針線一撮生紅熨不開上稱賞謂真才

桂堂詩

話

唐文宗夏日與諸學士聯句人皆苦炎熱我愛夏日長  
柳公權續曰薰風自南來殿閣生微涼時丁袁五學  
士皆屬繼文宗獨諷公權兩句辭清意足不可多得  
乃令公權題於殿壁字方圓五寸文宗視之歎曰鍾

王復生無以加焉

廣卓異記

劉景文作饒州監酒得一詩題芝山寺壁云數聲燕語  
落簷間底事驚回夢裡閑說與傍人都未信杖藜攜  
酒看芝山舒王作本路憲見之愛甚遂令權州學

古

今詩話

蜀人雍陶以進士第為簡州牧自比謝宣城柳吳興也賓  
至折挫忽有馮道明下第請謁告閤者道明與員外  
有舊及見呵曰與公昧平生何方相識道明曰誦員

外詩仰員外德遂吟曰立當青草人先見行傍白蓮  
魚未知又曰江聲秋入寺雨氣夜侵樓又曰閉門客  
到常疑病滿院花開不似貧聞之歡狎如曩昔之友

雲溪友議

王文公凝清族重德冠絕當時每就寢息必叉手而卧慮  
其寢寐中見先靈食飢飫不過十八片魯典絳州時  
司空圖侍郎方應進士舉別墅到郡謁見後更不訪  
親知閹吏遽申司空秀才出郭後入郭訪親知即不

造郡齋琅琊知之謂其專敬愈重之及知舉日司空  
一掇列第四人登科同年誄其姓名甚暗所圖太速  
有鄙薄者號為司徒空琅琊知有此說因名一榜門生  
開筵宣言於衆曰某叨忝文柄今年榜帖全為司空  
先輩一人而已由是聲彩益振爾後為御史分司舊  
相盧公攜酒訪之留詩曰氏族司空貴官班御史雄  
老夫如且在未可歎途窮其為名德重也如此

北夢

瑣言

狂放門

鍾傳鎮南昌有李夢符者放蕩酣飲好事者與語應口  
成詩後桂州刺史李瓊遣人謂傳曰夢符吾弟請遣  
歸鍾令求于市邸人曰夜來不歸不知所之有回常  
學士詩云罷修儒業罷修真養拙歲愚春復春到老  
不踈林裡鹿平生難見日邊人洞桃深處千株錦岩  
雪鋪時萬草新深謝名賢遠相訪求聞難博鳳為鄰

詩史

朱勰仕江南為縣令甚踈逸有詩云好是晚來香雨裡  
擔簷親送綺羅人李璟聞之處以間曹又有僧庭實  
獻詩云吟中雙鬢白笑裡一生貧璟聞云詩以言志  
終是寒薄以束帛遣之

同前

李瀚登科在和凝榜下同為學士會凝作相瀚為承旨  
當批詔次日於玉堂舊閣悉取圖書器玩留一詩于  
榻云座主登庸歸鳳闕門生批詔立鰲頭玉堂舊閣  
多玆玩可作西齋潤筆不人皆笑其踈縱

古今詩話



杜牧之登科後三年縱放為詩曰落魄江湖載酒行楚  
腰纖細掌中情十年一覺揚州夢贏得青樓薄倖名  
又曰觥船一棹百分空十載青春不負公今日鬢絲  
禪榻畔茶烟輕颺落花風

杜牧自御史分司洛陽李司徒罷鎮閑居聲妓為當時  
第一因會朝士以牧之嘗任風憲不敢邀置牧之諷  
坐客達李李遽馳書以招而牧之遂來謂李曰聞有  
紫雲者孰是因指示牧之作詩曰華堂今日綺筵開

誰喚分司御史來，忽發狂吟驚滿座。  
兩行紅粉一時回，意氣閒逸旁若無人。

裴思謙狀元登科作紅牋名紙謁平康里妓，因宿于里中作詩曰：銀釭斜背解鳴璫，小語低聲喚玉郎。從此不知蘭麝貴，夜來新惹桂枝香。

鄭谷登第後宿平康里作詩曰：春來無處不間行，楚潤相看別有情。好是五更殘酒醒，耳邊聞喚狀元聲。

楊汝士尚書鎮東川，其子及第。汝士開筵營妓咸集。汝

士命人與綾一端詩曰郎君得意正青春蜀國將軍  
又不貧一曲高歌綾一匹兩頭娘子拜夫人

潘道遥與許洞錢易為友狂放不羈嘗作詩云散拽禪  
師來踟躕醉拖遊女上鞦韆此其自序之實也後坐廬  
多遜黨亡命捕之甚急乃易姓名為僧入中條山許  
洞贈詩曰潘道遥平生志氣如天高仰天大笑無所懼  
天公嗔爾口叟叟罰教臨老投補衲歸中條我願中  
條山神鎮長在驅雷逐電依前趕出這老恠后會赦

以四門助教招之送信州安置復舞於市曰出砒霜  
價錢可贏得撥灰無弄火暢殺我以此士人不齒

放棄終身

並同前

姚巖傑梁國元崇之裔弱冠通墳典以詩酒遊江左凌  
忽前達旁若無人乾符中顏標典鄱陽初勅鞠場請  
岩傑紀其事文成千餘言標欲刊去一兩字巖傑大  
怒既而標已睚眦而已勒石遂令覆碑於地以車拽  
之磨去岩傑以一篇寄之曰為報顏公識我磨我心

唯只與天和眼前俗物闕情少醉後青山入夢多田  
子莫嫌彈缺恨甯生休唱飯牛歌聖朝若為蒼生計  
也合公車到薜蘿盧肇牧歙州傑在婺源先以著述  
寄肇肇知好使酒以手書褒美之贈以求帛迎至郡  
齋館穀如公卿既而日肆傲睨輕視子發子發嘗以  
詩咤岩傑曰明月照巴山岩傑笑曰月照天下奈何  
獨照巴山子發慚不樂無何會于江亭時蒯希逸在  
坐子發改令目前取一聯象子發曰遠望漁舟不濶

尺八岩傑遽飲一器憑欄嘔噦須臾節度遂令云憑  
闌一嘔已覺空喉有集二十卷曰象溪子逆旅豫章

不知所終

雜言

鍾山公鎮臨川賞牡丹有小吏手捧硯舉止有士人風  
公曰學詩乎曰粗親筆硯因令口占一篇其警句云  
三月莫辭千度醉一生能得幾回看公曰他日定成  
器因勉令就學明年謁嶺南李國老大加稱賞賚數  
百緡於金陵酒樓數日而盡醉中掛帆數百里至落

星灣半醒烟雨中登水心寺題詩於水軒曰分飛南  
渡春風晚却返家林事業空無限離情似楊柳萬條  
垂向楚江東

李白才思不羈有醉吟詩曰天若不愛酒酒星不在天  
地若不愛酒地應無酒泉天地既愛酒飲酒不愧天  
三杯通大道一斗合自然但得醉中趣勿為醒者傳  
憶賀知章曰欲向江東去定將誰舉杯稽山無賀老却

棹酒船迴

郡閣雅談

韓魏公出鎮中山有門客夜踰墻出宿娼家公知作種  
竹詩以警之殷勤洗灌加培植莫遣狂枝亂出墻門  
客自愧作詩云主人若也憐高節莫為狂枝贈斧斤  
公置一女奴贈之

青瑣集

詩話總龜卷三



欽定四庫全書

詩話總龜卷四

宋 阮閱 撰

詩進門

楊允元年二十一歲為光祿寺丞太宗極愛之三月後  
苑曲宴未得貼職不得與以詩貼寄館中諸公曰聞  
說宮花滿鬢紅上林絲管侍重瞳蓬萊咫尺無由到  
始信仙凡迥不同諸公進呈太宗訝有司不召左右  
以未得貼職為奏即日直集賢院與晚宴

古今詩話

翰林學士李宗諤以京官帶館職赴內宴閣門拒之獻詩曰戴了宮花賦了詩不容重覩赭黃衣無慘獨出金門去恰似當年下第歸公嘗舉進士御試下第因及之太宗覽詩即宣赴坐後遂為例雖選人帶館職亦

同赴宴

青箱雜記

周世宗幸廣陵孟貫能詩以一集獻之世宗見首卷貽棲隱洞譚先生詩云不伐有巢樹多移無主花謂貫曰伐叛弔民何有巢無主之有獻朕則可他人卿將

不免遂釋褐授官

江南野錄

太宗收并門凱旋日范杲叩廻鑾進詩曰千里版圖來

浙右一聲金鼓下河東賜一官

古今詩話

唐太宗征遼師還途中御製詩有鑾輿臨塞朔野陣

雲飛之句遂寧令何象進鑾輿臨塞賦朔野雲飛

詩名對嘉賞授贊善大夫詩有塞日穿痕斷邊鴻背

影飛縹緲浮黃屋陰沉護御衣之句

同前

吳越司賓使沈韜文湖州人有遊西湖詩云菰米蘋花

似故鄉不是不歸歸未得好風明月一思量武肅憫  
其忠鄉授以湖州刺史

遺一句同前

世傳琴曲宮聲十小調皆隋唐賀若弼製最妙一不博  
金二不換玉三泛峽吟四越溪吟五越江吟六孤憤  
吟七清夜吟八葉下聞蟬九三清十亡其名琴家名  
賀若而已太宗改不博金曰楚澤涵秋不換玉曰塞  
門積雪命辭臣採調製詞蘇易簡得越江吟詞曰神  
仙神仙瑤池宴片片碧桃零落春風晚翠雲開處隱

隱金輿挽玉麟背冷清風遠岑文本云非雲非烟瑤池  
宴片片碧桃零落黃金殿蝦鬚半捲天香散春雲和  
孤竹清婉入霄漢紅顏醉態爛熳金輿轉霓旌影亂  
簫聲遠不知孰是

稱賞門

太宗留意藝文好篇詠淳化中春日苑中有賞花釣魚  
小宴宰相至三館畢預坐咸使賦詩中字為韻上覽  
以第優劣時姚鉉詩先成曰上苑烟花迥不同漢皇

何必幸遼中花枝冷澱昭陽雨釣線斜牽太液風綺  
萼惹衣朱檻近錦鱗隨手玉波空小臣侍宴驚凡目  
知是蓬萊第幾宮賜白金百兩時輩榮之以比奪袍  
賜花等故事

薛道衡為人日詩曰入春纔七日離家已二年南人嗤  
之曰是底言語誰謂此虜會作詩及云人歸落鴈後  
思發在花前乃喜曰名下無虛士

小說舊聞

江為能詩少遊廬山白鹿洞題詩一聯于僻曰吟絳蕭

寺旃檀閣醉倚侯家玳瑁筵李璟見之謂左右曰吟

此詩者大是貴族遂為時輩所稱

江南野錄

成都周式作春詩題廉遜驛云珠簾綉戶遲遲日柳絮

梨花寂寂春王拱辰甚愛之

雲齋廣錄

白昊秋日郊步詩云鶴盤遠翅投孤嶼蟬曳殘聲過別

枝歐陽公稱為佳句

同前

馮太傅端嘗書云鳴髀直上一千尺天靜無風聲更乾

碧眼胡兒三百騎盡提金勒向雲看謂坐客曰可圖

於屏幃乃柳如京塞上詩也

倦遊錄

何涓襄陽人少為瀟湘賦為時所稱潘緯以古鑑詩著  
名或曰潘緯十年吟古鑑何涓一夜賦瀟湘零陵總  
記載何涓瀟湘賦云鏡斂殘色霞披曉光亦無全篇

古今詩話

楊大年同陳恕讀李義山詩酷愛一絕云珠箔輕明覆  
玉墀披香新殿闔腰肢不須看盡魚龍戲終遣君王  
怒偃師嘆曰古人措意如此深妙各歎服



李太白初自蜀到京師賀知章聞其名見之請為文出  
蜀道難示之知章曰公非人間人豈太白星精邪於  
是解金貂換酒醉而歸及見烏夜啼曰此詩可以泣  
鬼神其詞曰姑蘇臺上烏飛時吳王宮裡醉西施吳  
歌楚舞歡未畢青山欲啣半邊日金壺丁丁漏水多  
起看秋月墜江波東方漸明柰樂何又曰黃雲城邊  
烏欲棲歸飛啞啞枝上啼機中織錦秦川女碧紗如  
煙隔窻語停梭向人問故夫欲說遼西淚如雨

憲宗時北敵數寇邊大臣議和親有五利而無千金之費憲宗曰比聞一士人能為詩而姓字稍僻其詩曰山上青松陌上塵雲泥豈合得相親舉世盡嫌羸馬瘦唯君不弃卧龍貧千金未必能移性一諾從來許殺身莫道書生無感慨寸心還是報恩人侍臣曰此戎昱詩也京兆李鑾欲以女妻之令改姓昱辭焉憲宗悅曰又記得詠史詩云漢家青史上計拙是和親社稷歸明主安危托婦人豈能將玉貌便欲靜胡塵

地下千年骨誰為輔佐臣憲宗笑曰魏絳何其懦也  
此人如在可與鼎州武陵桃源足稱其吟咏士林榮  
之又蘇郁有詩云闕月夜懸青塚鑑塞雲愁薄漢宮  
羅君王莫信和親策要託安危患更多

裴慶餘咸通末佐李北門為淮南幕嘗同遊船舟師悞  
以舩篙水濺侍女衣上變色慶餘請為詩曰滿額鵝  
黃金縷衣翠翹浮動玉釵垂從教水濺羅裙濕知道

巫山行雨歸公喜令歌者傳之

古今詩話又唐賢村  
情謂李蔚守淮南日

布衣孫  
處士作

張祐有觀獵詩并宮詞白傳稱之宮詞云故國三千里  
深宮二十年一聲何滿子雙淚落君前小杜守秋浦  
與祐為詩友酷愛祐宮詞贈詩曰如何故國三千里虛  
唱歌詞滿六宮又詩寄祐云睫在眼前人不見道非  
身外更何求誰人得似張公子千首詩輕萬戶侯

楊祭酒嘗見江表士人項斯詩贈之詩云幾度見詩詩  
總好及觀標格過於詩平生不解歲人善到處逢人

說項斯由是四方知名

樂天初舉名未振以歌詩投顧况戲之曰長安物貴居  
大不易及讀至原上草云野火燒不盡春風吹又生  
歎曰有句如此居亦何難老夫前言戲之耳

丁晉公孫何齊名翰林學士王元之延譽嘗言二人可  
使白衣充修撰嘗贈之詩曰三百年來文不振直從  
韓柳到孫丁如今便合教修史二子文章似六經

杜紫微覽趙渭南早秋詩云殘星幾點鴈橫塞長笛一

聲人倚樓因目之為趙倚樓贈詩曰今代風騷將誰  
登李杜壇霸陵鯨海動秦苑鶴天寒今日訪君還有  
意三條冰雪借吟看

盧多遜獻太宗詩卷中有粟爆燒氈破猫跳觸鼎翻之  
句後與潘美樞密在內殿議事令宮人煨粟俄有數  
粟爆出燒損綉褥又嘗燒金鼎宮猫相戲觸翻因舉  
前詩曰詞人作詩信無虛語

武后遊龍門命群臣賦詩先成者賜錦袍左史東方虬

詩先成拜賜坐未安宋之問詩後成文理兼美左右  
莫不稱善乃就奪錦袍衣之其詞曰宿雨霽氛埃流  
雲度城闕河隄新柳翠苑樹花初發洛陽花柳此時  
濃山水樓臺映幾重羣公拂霧朝翔鳳天子乘春幸  
鑿龍鑿龍近出王城外羽從淋漓擁軒蓋雲蹕纔臨  
御水橋天衣已入香山會山壁嶄崿斷復連清流澄  
澈俯伊川塔影遙遙綠波上星龕奕奕翠微邊層巒  
舊長千尋水遠壑初飛百丈泉綵伏紅旗遠香閣下

輦登高望河洛東城宮闕擬朝迴南陌溝塍殊綺錯  
林下天香七寶臺山中春酒萬年杯微風一起祥花  
落仙樂初鳴瑞鳥來花落紛紛更無已稱觴獻壽烟  
霞裡歌舞淹留景欲斜石間猶駐五雲車鳥旗翼翼  
流芳草龍騎駸駸映晚花千乘萬騎鑾輿出水靜山  
空嚴警蹕郊外喧喧引看人傾心南望屬車塵囂散  
引颺開黃道王氣周迴入紫宸先王定鼎三河固寶  
命乘周萬物新吾君不是瑤池樂時雨來觀農扈春



廣卓異記

郭元振為通泉縣尉前後掠所部千餘人遺賓客百姓  
苦之武后使籍其家有書數百卷令問其貨財所在  
知皆已濟人於是竒而免之召見大稱旨令口占古  
劍歌進天后竒之命繕寫贈諸學士歌曰君不見昆  
吾鐵冶飛炎烟紅光紫霧俱赫然良工鍛鍊經幾年  
鑄得寶劍名龍泉龍泉顏色如霜雪良工咨嗟嘆竒  
絕琉璃匣裡吐蓮花錯鏤金環生明月正逢天下無飛

塵幸得周防君子身精光黯黯青蛇色文章片片綠  
龜鱗非直結交游俠子亦嘗近視英雄人何言中道  
遭弃捐零落湮淪古獄邊雖復塵埋無所用猶能夜

夜氣冲天

同前

楊少卿凝式有材自負既不大用多佯狂自穢遊寺觀  
遇水竹幽勝之地吟咏忘歸墻壁之上筆跡多滿僧  
道愛護莫不粉壁光潔以俟揮掃遊客嘆賞故馮瀛  
王次子少吉題壁下曰少卿真跡滿僧居祇恐鍾王

也不如為報遠公須愛惜此書書後更無書安鴻漸題  
曰端溪石硯宣城管王屋松烟紫兔毫更得少卿老  
書札人間無此五般高

洛陽舊聞

張翼善詩嘗投詩兩帙於京師王相浦王諭之以詩云  
清河詩客本賢良惠我清吟六十章詞格宛同羅給  
事工夫深似賈司倉登山始覺天高廣到海方知浪  
渺茫好去蟾宮是歸路明年應折桂枝香

廖圖字贊禹虔州人文學博瞻為時輩人所服湖南馬

氏辟幕下奏天策府學士與劉禹李宏皋徐仲雅蔡  
昆韋鼎釋虛中齊已俱以文藻知名更唱迭和今有  
集行於世贈家陵上人云暫把枯藤倚壁根禪堂初創  
楚江瀆直疑松小難留鶴未信山低住得雲草接寺  
橋牛笛近日銜村樹鳥行分每來共憶曾遊處萬壑  
泉聲絕頂聞又和人贈沈彬詩云冥鴻跡在烟霞上  
燕雀休誇大廈巢名利最為浮世重古今能有幾人  
拋逼真但使心無著混俗何妨手強抄深喜卜居連

嶽色水邊松下得論交僧齊已寓渚宮與圖相去千里而每有書往來臨終有絕句寄圖兄弟云僧外閑吟樂最清年登八十喪南荆風騷作者為商榷道去

碧雲爭幾程

雅言雜錄

江南韓熙載稱左偃能詩有集千餘首偃不仕居金陵寄廬山白上人云潦倒門前客間眠歲又殘連天數峰雪終日與誰看萬丈高松古千尋落水寒仍聞有新作懶寄入長安又昭君怨云胡笳聞欲死漢月望

還生寄韓侍郎云謀身謀隱兩無成拙計深慚負耦  
耕漸老可堪懷故國多愁反覺厭浮生言詩幸偶明  
公許守朴甘遭俗者輕今日况聞搜草澤獨悲憔悴  
卧昇平韓見詩感歎厭浮生不喜不逾月果病卒年  
二十四王操有詩哭之曰堂親垂白日稚子欲行時  
温庭筠彦博之曾孫本名岐字飛卿少敏悟薄行無檢  
幅多作側詞艷曲與貴胄裴成令狐馮等飲博與李  
商隱皆有名號温李醉為邏卒擊折齒由汙行訴不

得理連舉不第徐商鎮襄陽辟官不得志歸江東紀  
唐夫贈詩曰鳳凰詔下雖沾命鸚鵡才多却累身人  
多諷之庭筠既以才廢引長沙之事自云豈司命重  
文章而輕爵祿虛有授焉浮於行者必有怨尤不自  
咎也

並同前

長安三月五日兩街看牡丹奔走車馬慈恩寺元果院  
牡丹半月開故裴兵部憐白牡丹詩自題於佛殿東  
頭蜃壁之上大和中敬宗自夾城出芙蓉園路幸此

寺見所題詩吟玩久之因令宮嬪諷念及暮此詩滿  
六宮矣詩曰長安豪貴惜春殘爭賞先開紫牡丹別有  
玉杯承露冷無人肯就月中看

南部新書

李昇移鎮金陵旁羅隱逸沈彬赴辟知其欲取楊氏因  
獻山水圖詩曰須知手筆安排定不怕山河整頓難  
覽之而喜

任濤豫章人詩名早著有露搏沙鶴起人卧釣舩流他  
皆倣此數舉敗于垂成李常侍隲廉問江西時與放



鄉里之役民俗互有論列隲判江西界內凡有詩得似濤者即與免役

撫言

郭祥正自梅聖俞贈詩有采石月下聞謫仙以為李白前身緣此有名又有金山行云鳥飛不盡暮天碧漁歌忽斷蘆花風大為王荆公所賞秦少章嘗云郭功父過杭州出詩一軸示東坡先自吟誦聲振左右既罷謂坡曰祥正此詩幾分坡曰十分詩也祥正問之坡曰七分來是讀三分來是詩豈不是十分也

王直

方詩話


徐俯字師川忠愍公之子有平生功名心夜窓短檠燈之句大為山谷所賞山谷其舅也

蘇伯固之子名庠字養直作清江曲云屬玉雙飛水滿塘菰蒲深處浴鴛鴦白蘋滿棹歸來晚愁看蘆花一片霜扁舟繫岸依林樾蕭蕭兩鬢鬢吹華髮萬事不理醉復醒長占煙波弄明月坡曰若置在李太白集中誰疑其非

秦覲字少儀好為詩初亦不甚工既而以獻山谷山谷  
贈之曰乃能持一鏃與我箭鋒直又云自我得此詩  
三日卧向壁才難不其然有亦未易識當時交游以  
此言為過然少儀緣此思大發交游亦刮目視之

並

同前



詩話總龜卷四